

SCHNITZELBÄNK

2002

Vo de Schwarze

Wo sech im Wankdorf d'Mäscht hei boge
U mit eme Chlapf i d'Luft si gfloge,
Hei mir ghofft, es chönnti länge,
z'Bundeshus grad o no z' spränge.

Dr Double You Bush, dä armi Tropf,
Gheit bim Brätzeli ässe uf e Chopf.
Das isch zum Glück nur halb so schlimm,
Denn es hett ja nid viel drinn.

Dr Bär isch wäg, dr Luchs isch tot.
Üsi Frösch i grosser Not.
Da chöi mir eifach nid verstah,
warum isch dr Fuchs de geng no da.

Dr Leuebärger isch z'tiefscht betroffe.
Das laht üs alli zäme hoffe.
Obschon ganz z'Innerscht jede weiss,
Dä findt doch alls e Huerescheiss.

Für zwölf Millione, fuf Jahr vorus,
Bringe mir Öich gärn der Schmus.
Mir spile chli Super Mario
U houes näh uf u dervo.

Trotz Gitter, Schmier u Hindernis
Hei d'Amis i ihrer Botschaft Schiss.
Mir hätte für se – falls si wei –
Im Bäregrave no es Plätzli frei.

All Verbrächer vo nah u färn
Chiente gärn i ds Gfängnis z'Bärn.
Doch ine z'cho sigi ja
Viel schwieriger als use z'gah.

D'Schwyz steiht still, Grounding total.
D'Stimmig im Land: katastrophal.
Die einzig Rettig, wo überzügt:
Dass ändlech mal dr Blocher flügt.

900mal – das isch ke Scherz –
Laht sech dr Stapi fahre im Merz.
Das choscht nid viel, denn würtlech z'Tüüre,
Sig, wenn er probieri sälber z'stüüre.

Dr Georg W. Laden u dr Osama Bin Busch
Träffe sech ire Höhli im Hindukusch.
Mir fändes toll u für all ä Gwinn.
S'bliibte beidi zäme dinn.

Tuesch Zigarette schmuggle, Fränkli wäsche,
Machscht fuuli Gschäft i di eigni Täsche,
Lügsch alli a, de wirsch am Änd
Nationalratspresidänt.

E Vernisage, es Glesli Wy,
Da isch der Tschäppät geng derbi,
Wer wott Stapi wärde, mir gsehs ja i,
Muess tatsächlech bsoffe si.

Dr Ospel sig schiins e glatte Siech,
Wo an dr Fasnacht alli Joohr mitmiech.
Und kaine merggt wien är uns iinelait,
Will är si Larve s ganz Joohr trait.

Di nöi Miss Schweiz isch jung u schön
U si kennt scho elf Kantön.
Meh bruchts nid, si isch parat,
Als Metzler-Ersatz im Bundesrat.

Letschts Jahr hei mir für e Stapi gsammet,
Damit dä arm Cheib nid vergammet.
Was mir das Jahr sammle i üsem Huet,
Chunnt vollumfänglech dr Expo z'guet.

Tele 24 isch passé,
TV 3 chasch o nümm gseh,
D'Swissair am Bode, dr'Gotthard zue,
Ändlech hei mir üsi Rueh.